

06/05/1997

Perkongsian Pintar hadapi globalisasi: PM (HL)

Zainuddin Ayip in Kasane (Botswana)

KASANE (Botswana), Isnin - Datuk Seri Dr Mahathir Mohamad yakin cabaran globalisasi yang dihadapi negara-negara membangun, terutamanya dari negara maju boleh ditangkis menerusi gagasan Perkongsian Pintar.

Menyifatkannya sebagai satu konsep terbaik bagi negara membangun untuk memantapkan ekonomi masing-masing, Perdana Menteri menegaskan Pengkongsian Pintar mampu menangani sebarang bentuk cabaran bakal dihadapi.

Sehubungan itu, beliau berkata negara-negara membangun perlu mewujudkan perpaduan dan saling berganding bahu sesama sendiri.

"Kita masih ada harapan jika kita saling bekerjasama. Jika kita dapat membentuk Perkongsian Pintar, jika kita bantu membantu, keuntungan akan kita kecapai bersama," katanya berucap di Dialog Antarabangsa Selatan Afrika 1997 bertemakan Perkongsian Pintar di sini, hari ini.

Dialog dua hari itu dihadiri oleh semua sembilan pemimpin negara yang menganggotai Komuniti Pembangunan Selatan Afrika (SADC). Selain Dr Mahathir selaku tetamu kehormat persidangan, pemimpin lain yang turut diundang ialah Presiden Afrika Selatan, Nelson Mandela; Presiden Kutumile; Masire dari Botswana, Presiden Robert Mugabe dari Zimbabwe; dan Presiden Sam Nujomo dari Namibia.

Konsep Perkongsian Pintar membabitkan kerjasama pemimpin politik, sektor awam dan swasta diilhamkan di Malaysia menerusi Dialog Antarabangsa Langkawi lalu yang turut dihadiri beberapa pemimpin Afrika.

Perdana Menteri berkata, perkongsian ini boleh dilaksanakan sesama negara di selatan Afrika. Mereka boleh menjalin hubungan dan mewujudkan kerjasama dengan negara Asean dan negara di lingkungan Lautan Hindi.

Bagaimanapun, beliau berkata kestabilan politik cukup penting untuk membangunkan sesebuah negara selain menangkis ketidakadilan dari negara maju.

Negara membangun menghadapi masalah untuk menuntut kemerdekaan. Walaupun penjajah sudah keluar, dikhuatiri ada suatu bentuk penjajahan baru yang mungkin dihadapi.

Di peringkat dalam negara, Dr Mahathir menyarankan konsep perkongsian itu diwujudkan dengan kerjasama antara kerajaan, sektor swasta dan kesatuan sekerja.

"Kita kena pastikan kerajaan harus berdedikasi membangunkan negara dan seterusnya mewujudkan kesejahteraan rakyat. Kita dari Selatan dan negara membangun boleh tubuh bank, kilang, pusat beli-belah serta rangkaian hotel di negara kaya. Negara maju juga boleh berbuat demikian di negara membangun.

"Malangnya kita tidak ada bank, industri dan rangkaian perniagaan di negara maju. Kita kluatir akan menjadi orang kerdil," katanya.

Mengenai dialog kali ini, Perdana Menteri berharap hasil dan keputusannya akan dilaksanakan di negara masing-masing untuk kebaikan dan kesejahteraan rakyat.

"Kita datang dari jauh untuk menghadiri dialog ini. Kita datang ke sini kerana kita prihatin terhadap negara dan rakyat. Sebagai pemimpin, kita bertanggungjawab terhadap kebajikan rakyat," katanya.

(END)